

四庫全書

集部

欽定四庫全書

集部

紫微集卷一

一至四

詳校官庶吉士

臣

瑚圖禮

主事

臣

呂雲棟覆勘

謄錄舉人

臣 秦

耦

謄錄副貢生

臣 趙

汾

欽定四庫全書

集部四

提要

紫微集三十六卷

別集類三宋

臣等謹案紫微集三十六卷宋張嶠撰嶠字  
巨山襄陽人宣和三年上舍中第紹興九年  
除司勳員外郎累遷敷文閣待制知衢州終  
於提舉江州太平興國宮事蹟具宋史文苑  
傳嶠為陳與義之表姪少時嘗從受學故劉

克莊後村詩話謂其詩句法與簡齋相似而於五言古詩尤極賞其語意高簡意味深遠又克莊所摘七言絕句如故園墳樹想青蔥諸篇尤能以標格見長而集中似此類者尚多大抵絕句清和婉約較勝與義其他雖未能遽相方駕而氣體高朗頗足以自名一家至古文典雅沈實亦尚有北宋諸家矩矱所上奏議如論和戰守論攻取等篇史皆採入

於當時事勢尤條析詳明惟紹興復古詩一章貢諛秦檜深玷生平考朱子語錄有云金人敗盟時秦檜大恐顧朝士問計張巨山微誦曰德無常師主善為師善無常主協于克一檜因留與語巨山為之畫策檜喜即命作奏藁倉卒不仔細起頭兩句以德無常師為伊尹告成湯陳力就列為孔子之語尋擢巨山為中書舍人有無名子作詩嘲之云成湯

為太甲宣聖作周任云云是嶠本因附檜得  
進陳振孫書錄解題亦載此事且稱檜旋疑  
嶠貳已未幾亦罷然則此詩之作乃借以修  
好於檜者故本傳謂詩進後將復召用殆由  
檜意解而然特作史者不能得其情耳今其  
代檜奏藁雖已不存而是詩尚傳留供千秋  
之嗤點亦足以昭炯戒矣宋史藝文志載紫  
微集三十卷書錄解題則作張巨山集亦三

十卷自明以來久無傳本今据永樂大典所  
錄裒輯排比諸體咸備當已甚所缺遺以其  
篇帙較富析為三十六卷仍依宋史題作紫  
微集復其舊目焉乾隆四十六年九月恭校  
上

總纂官

臣紀昀陸錫熊臣孫士毅

總校官

臣陸費墀





欽定四庫全書

紫微集卷一

宋 張嶠 撰

賦

梅花賦

潘騎省之植花氛氲河縣桓司馬之種柳依依漢南未  
若茲梅之峻潔遠自託於層巖格侔蕙藍志傲冰霜青  
枝瘦而依蔭亂蘂繁而向陽風披逸態月射孤光挺出  
塵之絕艷吐超世之奇香若乃遠壑冰消疎林雪後沙

村迥而日晚石澗淺而寒溜臨山徑之欹危出茅簷之  
左右或芬敷而盛發或伶俜而欲瘦或含葩而未吐或  
噴藥而競秀其高者如舉其低者如墜其疎者如刻其  
密者如綴其素者如愁其絳者如醉傾日而煦者如笑  
迎風而靡者如愧覩節物之芳華亂鄉愁於晚歲懷故  
園之春色惟茲花之頗類嗟物是而人非閱節同而時  
異矧昔壯而今老復前豐而後悴攀柔條而未折嗅青  
藥而墮淚悲憔悴於荒山惜賞心之莫會如志士之陸

沉亦何為乎此世羌欲去而還止步落英而徒倚眷孤  
芳之信姱諒瑤華之莫比故知國香服媚非獨燕姑之  
幽蘭珍樹瓏璵未下唐昌之玉藥

中秋賦

陳王之客元瑜從軍吳會季重出宰朝歌寂寥觀臺賓  
從頓寡時當仲秋積雨新霽烟消廣廈步蘭路而逶迤  
美西園之清夜悵別遠而會稀感時遷而物化乃設醴  
以命賓躋凌風之累榭中置以後酒酣耳熱顧公幹而

謂之曰今茲野有鳴鶴天絕歸雲丹楓微脫白鴈初賓  
望舒曜夜而迥徹六合清朗而無塵茲遊樂乎盍為寡  
人賦之公幹乃執簡而言曰臣生居東國少遭喪亂幸  
值明時筵跡賓館臣聞幽籥迎寒遠載於周典乘查上  
泝近傳於漢臣臞仙則採露於栢杪吳士則觀潮於水  
濱信白藏之令月蓋西陸之佳辰也于時天宇正碧涼  
夜方永瞻東峯之腫朧見素輝之初引斜漢淡而茫茫  
列宿疎而烟烟白露泣而晶熒回潭澄而遠鏡翫老蚌

之含胎驚棲禽之不定俄而隨珠委曜趙璧舒光羣峯  
變縞曠野凝霜映林岫以玲瓏射棖薨而焜煌散珠樹  
之清樾瑩美人之明璫於是停妙舞息繁吹聆清籟於  
林表聽胡笳於空外望桂影而凝情睇澄輝而佇思悵  
冰輪之既滿諒無遠而不燭照思婦之高樓鑑幽人於  
空谷光出塞而漫漫影流波而煜煜乃有負羽少年懷  
才滯史對絕景而恨結悲故鄉而心死況乎操琴多雍  
門之意琵琶有出塞之聲征衣搥而未寄戍卒去而將

行朋友散兮山海隔音書絕兮雁無憑於斯夕也望千里之素魄緘萬恨於幽情莫不言將發而氣塞語未終而涕零者矣於是德祖聞之傷懷慷慨泣下歔歔含毫奮筆而為明月之詩曰秋氣高兮桂魄圓風泠泠兮露團團歲將暮兮蘭菊芳思佳人兮天一方照蘭殿兮映綺羅呈激楚兮發陽阿人生宴樂兮孰知其他公幹乃跪而言曰夫古人以宴安為酖毒沉湎為至戒今流連長夜絲竹繁會載號載呶蜩蟬羹沸何吾子之賦獨無

畫規之義乎乃歌曰酒既酣兮夜既闌管停吹兮絲罷  
彈長袖拂面為君歡願公子兮保歲寒輔明主兮寰宇  
安翫清輝兮復年歡陳王於是歛衽謝客三復至言永  
以為則

壽賦并序

竊以某官以仲冬初五日降誕仲冬者一陽復之時也  
五者大中之位也至陽所以伏羣陰彼夷狄者中國之  
陰也大中所以距頗邪頗邪者小人之謂也天將以公

攘戎狄而退小人其兆既存矣謹按洪範惟皇之極欽  
時五福用敷錫厥庶民由是觀之自天子至庶人大中  
既建則五福從之其為福莫大於此者謹成古賦一首  
以申其義且致善祝之意云爾歲強國赤奮若兮仲冬  
皇極實生偉人兮以佐王國稟正陽之貞性兮資大中  
之妙質宜博塞而修姱兮好是正直挺濯濯之瑰姿兮  
角犀豐盈偉視瞻之英發兮進退齊平事紛至而畢應  
兮刃新發矍然豁達而不忌兮一毫莫撓抗逸氣而無



前兮雲夢可吞進羣士而下之兮言色惟溫視寇氛猶  
一決兮抗志不羣誓一掃而平之兮歸報天閭宜公宜  
侯兮夾輔大君銘功鼎鐘兮畫像麒麟原建子之令月  
兮一陽來復考皇極於元日兮大中斯得惟一陽復而  
中建兮羣陰伏而頗僻銷中國強而君子進兮可驗其  
由願公攘戎狄兮勿速勿亟去小人兮勿二勿惑修德  
政而繕甲兵兮戎醜自懷進廉直而退貪佞兮君子大  
來戎狄攘而小人去考休徵兮五福是具膺公衮兮踐

槐序間兩社兮為王室輔原厥初之畀付兮諒非偶然  
雖公德之既懋兮尚祈勉旃秉德不忘兮奉以周旋繁  
祉優裕兮安樂延年下吏獻言永矢弗諼

續囚山賦并序

余居山二年汲汲鮮況讀柳先生囚山賦因嘆曰无桎  
梏而獨居于人之地真囚也或曰柳先生得罪於時放  
逐湘南欲去不可故云今子非得罪居此其去也顧不  
在子耶余曰子厚之所為囚者人也其不可去者罪也

余之所謂囚者天也其不可去者勢也客未解作賦以  
曉之因命之曰續囚山賦其辭曰環麋庸其幾里兮中  
間櫛比乎山丘如疾風之過鉅海兮翠濤競起而漂浮  
窘束偪仄紛以回互兮氣壅結而不流產毒孕怪兮土  
風殊異乎中州陂陀綿亘若園土兮草樹鬱叢棘之相  
樛仰天俯地了不見其隆寬兮懷壹鬱而增憂嗟余生  
之不辰兮偶託跡而淹留何懷安而不去兮乃獨堪此  
牢愁豈不樂通都之是處兮與羣俊而遨遊顧世路方

險絕兮羊腸莫之與侔風波蕩潏兮行客沉舟讒口听兮又將搽彼戈矛余雖厭是而欲往兮復懾讐而更休明方夷而未融兮時方剝而未賁忍尤而攘垢兮甘作山之孤囚

憎雨賦

皇天不容於昭明兮白日不容於顯融惡堪輿之清朗兮好雲霓之晦靄反明以為暗兮變晝而作夜莽昏昏而不可訊兮誰為此者豈造物之固然兮將羣陰之所

為苟大鈞之若是兮吾將排闥闔而問之建列宿以為  
旌兮召豐隆以為御令祝融使先驅兮厯元冥而問故  
命蓐收司刑兮臯陶為理囚屏翳於雷淵兮制飛電而  
誅虹蜺聞羲御之將駕兮吾將懷椒糈而要之皇天反  
其明兮后土無所污望舒承夜兮昏與明其代序卷此  
志而弗抒兮吾猶窮困乎此時也將冥行以問塗兮又  
何以為此態也

四言詩

紹興中興上復古詩并序

臣嶠昧死再拜臣伏觀皇帝陛下以天明地德紹覆載之功迎善氣啓興運繼統業拯民命撥衰亂致大定自天地剖判以後書契以來中興復古之君比德較功莫有望其彷彿者初龍翔於王室始騷之時撫運於炎正中微之日豺狼縱橫羣盜滿野志存民命好生諱殺惟務聳德以變其野心兢兢業業惟孝是圖惟親是念卑宮室之奉省嬪御之幸惡衣菲食早朝而晏罷以儆上

帝之喪乃臨御之九年起大丞相太師益國公秦檜於  
閒廢之中明年復相之與之共圖中興之事君臣一德  
如魚之有水聲音之相和鹽梅之相濟不動聲氣而神  
化密運天下莫可測知至於聖孝日躋是崇是贊所以  
感通庶類逆釐三神者雖夫婦之愚咸知其有善應矣  
是以內之則盭夫悍將頻首聽命而無項領之虞遠之  
則惡吏姦氓勉於承化而無凌犯之變風移而益淳刑  
輕而幾措於以風德於遠方而異類為之革面達孝於

絕黨而敵國為之改圖初年而和議定兵革息孝德之  
始驗也嗣歲而梓宮至母后歸孝德之成功也予以示  
天下則何人不勸于以致治功則何事不成於是釐舉  
嘉義以飾至治凡稽古禮文之事以次貫行郁郁之皇  
文丕天之大律所以耀德於廣遠而新民之視聽者不  
可勝載臣不敢毛舉庶事姑撫其大者言之奉太母於  
慈寧極天下之養盡家人之禮至孝也選淑德嬪皇極  
正人倫而厚風俗至德也建立太學萃英俊以流德化



知本也新圖書之府嚴求書之令廣聞見以務博儲人材以待用右文也行鄉飲於郡邑以班序顛毛崇化也正經界於阡陌以平均賦入卹民也至于愛民力矜物命節誕彌之宴足以示慈惠而已而不以侈靡為尚盛德之事於是備矣此獨致盡於人事者耳若夫崇壇壝之制靖籩豆之列純犧牲之奉嚴玉帛之陳所以致禮於天地也飭祖廟以崇宗祏之奉建原廟以謹衣冠之游日祭月祀共事無爽所以致孝于祖考也上稽漢制

下考本朝築宮修祀以奉太乙為民也耕千畝以勸民  
謹三推以率之敦本致力莫不競勸民事也瑞乙始  
至帶韜而祠莞簟効祥錫美有緒所以謹國本也先成  
民而後致力於神上下服媚神人胥悅由是豐年屢應  
田穀睦熟瑞物狎至符况沓來固其所也若是而瘠無  
歌詩布宣令德以昭示來世則秉筆之士何以避辟自  
昔中興之主如夏康周宣漢之世祖唐之憲宗咸用干  
戈以復故業或功成于一面事至微眇而當時綴文之

士猶且作為歌詩以稱頌功業以垂後世而況我宋中興皇帝陛下得賢聖之佐成昭明之業而不被之聲詩薦之郊廟協聲依詠以樂和平汗青書策以示得意使後世何稽焉臣雖固陋日嘗以文字從詞臣之後深恐徒老于外無片言以歌詠盛德成功少佐聖治之光明臣終且不瞑用是輒忘其蕪累再拜稽首而為是詩其詞有曰天監我宋受命以人咋為亂階以啓聖人皇帝嗣位其仁如春萬邦欣載共惟帝臣垂衣高拱惟務儉

勤卹民不怠懋穡勸分卑宮勿飾服御無文膳食取具  
不羞庶珍內官弗備簡御嬙嬪抑損戚畹登崇搢紳吏  
除苛繞獄去放分刑罰不試號令不頻旰食宵衣導率  
以身行之期年天下歸仁皇帝躬行過於堯禹如天不  
言乃帝之所內資稟命外須訓撫不有相賢孰資察補  
天舍其衷遺之碩輔實惟舊臣乃吾肱股昔以夢求今  
以德錯皇帝曰咨惟予與汝我唱而和無或疑阻如手  
如臂如心如膂如彼事神汝為椒糝如彼琴瑟相待憂

拊相臣受命于帝其訓敢憚夙宵以圖淑問衣不及帶  
冠不暇正內事撫摩外修好聘忍尤攘紛徂惟求定皇  
帝之孝克邁帝舜相臣佐之茲惟無競上感穹昊下格  
殊隣以暴為恩易頑以馴母后既歸東朝侍御天下載  
歡若饑得哺天子躬儉惟親是豐未明求衣朝長樂宮  
禮備家人養以天下先意承旨事無違者天子行孝天  
下承風胥訓胥效比屋可封乃建中宮以母四海詩首  
關雎易稱中饋天子之尊亦資內助上奉慈顏下式衆

宇事親底豫化民致和始於壹閩邦國是訛太學聲建  
四方是極增博士員導以經術有來英髦充牣上京三  
年大比以考其成異時之用維公維卿石渠廣內圖書  
之淵羽陵之蠹斷簡之編是息是游英俊在焉逸羣之  
彥比跡卿雲懷材待問發聞揚芬馳騁古今上下典墳  
考正律度是為景鍾導和殖財國用以豐不窳不櫛咸  
中典刑有渙其章上公是銘茲器惟則允為國經德爵  
之亞莫尚惟齒班序顛毛以為民紀鄉飲既行郡邑是

遵洙泗之風無復斷斷井田既壞民困劫假乃正經界  
以實多寡賦入既均貧富不病非上卹之孰拯其命誕  
彌之節式宴示慈樂不計費孰敢節之皇帝曰咨費財  
無藝親降德音以禁肆侈天下歡然稱盛德事匪帝命  
之臣子曷議著之令甲付之史官永永萬年無或敢干  
人事既洽惟神是事于廟于郊各盡其禮其郊維何歲  
事圜丘帝御六龍冕十二旒既新宮架既備禮服有潔  
其牲有溫其玉合祛天地侑以祖考樂奏六變其音肆

好問誰相祀實維上公登降跪起有肅其容天地並況  
瑞物來下天子萬年以有神嘏其廟維何可以觀德德  
盛不祧祀事不忒祖廟既飭旅楹有閑原廟繼作以游  
衣冠若節春秋皇帝戾止薦獻有容祖考咸喜禮成而  
退祇奉不瀆天子萬年永綏遐福天神貴者莫尊太一  
置祠為民其宮有洫既倣謬忌道開八通皇帝臨饗威  
神是崇天人相際福祿攸同國南千畝是為帝籍天子  
肇祀以祈黍稷我黍與與我稷翼翼以享以祀以為民



食福祿綏之萬世無數乃營吉壤肇建高禩何以歆之  
帝德不回瑞乙既至后率所御以弗以祈有秩斯祐千  
億之祥兆於帝武天錫皇帝聖欽不遲事神保民以莫  
不祇上帝臨之云何以報維年屢豐諸福是効非維豐  
之又布護之東西北南咸錫予之稼茂於野粟積于倉  
禮義興行民俗以臧桴鼓不鳴獄訟衰息人有蓋藏道  
無捐瘠和氣所蒸化為瑞物甘露零庭近在郊邑有木  
呈祥合枝共柢考傳驗符遠人不貳或剖其中自然成

文太平是告希代莫聞豐年屢應衆瑞應圖皇帝謙恭  
不以自居圖回庶事益慎厥初君臣相戒可否吁俞政  
過三代言成典謨厯選后辟前載所無在昔中興周漢  
二宣夏康商宗漢祖晉元咸用干戈配天祀夏其臣歌  
頌或列于雅方之皇帝燭火太陽顧無歌詩垂世用光  
詞臣伏罪無以塞責誰其詩之以佐皇德下臣張嶠過  
不自揆日官西掖待罪文字敢頌厥美以贊后功江漢  
崧高不足比隆

紹興聖孝感通詩并序

臣嶧昧死再拜臣恭覩皇帝陛下嗣位於炎正中微之初因衰激極導迎善氣數年之後天有還形羣盜衰息疆場少安民人接餼年穀豐熟唯是除戎警備之事日以振將疆卒武人有奮心舉而并勅敵復故地宜如竈上掃除而方且詔封疆之臣無得妄動敵來則禦之去則已曰南北等吾赤子也勿以深入多殺為右始也淺陋不望清光之臣俴俴然率不喻聖意所謂下臣嶧

輒不自揆竊迹行事而加深思焉若有得其解於萬分者蓋敵固吾仇也而二聖大母在焉顧可投鼠而忌器乎或問臣曰桃應問孟子曰舜為天子臯陶為士瞽瞍殺人則如之何孟子曰執之而已矣然則舜不禁歟曰夫舜惡得而禁之夫有所受之也然則舜如之何曰舜視棄天下猶棄敝屣也竊負而逃遵海而處終身訢然樂而忘天下然則孟子之說非歟曰此殆非賢聖之言意羣弟子之失其傳焉耳夫舜聖人之以孝聞者也

使其以受堯之重既不能庇其親而執之又不能終其所畀付而去之是兩失也如是曷以聖為凡六經之作所以為範於後世然今之所載者常道而變故之來也無窮設有遭非常之變而不能得聖人之意於文字之表曷能曲有所暢乎仰惟皇帝陛下嗣服以來內之以治戎事理邊疆常若寇至而不少解者致重於宗廟也外之所以不以并敵戰勝為武而率以柔道懷服獷悍者致保於君親也在於重宗廟至義也保君親至孝

也其視孟子之說不亦兩得乎於是孝至而益加義立而增修措之天地而神明協其應施之蠻貉而盪夫易其慮紹興辛酉金人來告和且許以先帝梓宮歸于我別命貴臣奉太母輿衛以歸其明年八月某甲子皇太后至於行在所前至一日皇帝備法駕率羣臣奉迎於郊舍之外于時天地絪縕豫日景清明臣民歡虞和氣洋溢謹聲所暨川嶽振蕩其明日乃歸于長樂宮於是卿士庶人歎息忭躍遠邇一辭咸曰皇皇乎丕天之盛事

自天地剖判以來未嘗有也向非皇帝陛下自得聖人  
之意於六經之所不載且有同德之臣以輔其治何以  
至於是哉自今以往天下之學者始知忠孝有兩全之  
道仁義無偏厚之失向使衛輒聞之必不假王父之命  
而有距父之事漢祖聞之必不以就天下之故而肆分  
羹之言軼乎千世之上固已合符六經垂之萬世之統  
可以軌範來葉非聖上其孰能之斯舉也君子書之以  
襲經辯士語之以稱博推而行之可以馴至於聖域詩而

欽定四庫全書

紫樹集  
卷一

去

陳之可以淪浹於性情士生斯時獲覩凌風絕輝而不  
動於耳目不發於文辭以稱頌盛德顧視曩哲不亦惡  
乎臣不佞嘗以文字待罪詞掖雖獲戾屏居側聆慶會  
情發於中不能以淺陋自己敢再拜稽首而為之詩曰  
宋有天下逮乎八世猛敵橫生侵欲不忌堯湯水旱文  
景苗異數則使然豈人攸暨皇帝承統甚武且仁內銷  
姦孽外備殊鄰濩明濩昌師武臣力抵掌含怒日思奮  
殛皇帝曰咨咨女將臣慎守疆場以保吾民敵來則禦



折北勿追姑修吾德以待所歸人亦有言投鼠忌器矧  
彼狡焉吾親是質彼兵攸恃我則德攻靡以歲月徼天  
之衷彼雖剛戾不可擾馴我視其欲以舒吾仁始我有  
衆公卿庶士謂彼悍驕庸知德義苟有誠信金石為開  
豚魚之孚惟道之懷有唐睿真亟詔求訪惻怛之誠寧  
甘百調皇帝曰咨予由是心彼雖我詐我惟爾忱孝悌  
之至神明可通惟彼不信天誘其衷行人是來言棄舊  
惡我奉慈母歸御長樂八月甲子至行在所天子在所

天子郊迎其從如雨老稚仰觀踴躍呼舞卿士相趨肅  
穆偃僂天地感通發祥頽祉卿雲鬱興輪囷離詭屏翳  
不驚川后靜波雲飛淵泳謹聲相和玉虬沛艾芝蓋穹  
崇千乘雷動萬騎風從天子是侍如長樂宮渤澥為杯  
華嵩為豆舉烽行炙撞鐘命酒既勞王爵下逮奔走萬  
歲稱觴獻太母壽敷天之慶周浹寰宇薄海內外無或  
失所皇帝之孝振古曷遇睿算無疆永作民主人無疾  
癘田多稷叅兵革不試四夷款附太母萬年康疆燕豫

皇帝之孝莫與比德錫羨無疆子孫千億莞簞發祥開  
統拓迹巍巍岐岐詵詵翼翼有綠其車有赤其舄太母  
萬年含飴燕息始歸太母小大具疑謂將我廷胡寧以  
歸皇帝之孝先定不易爰有廷臣協比我德有贊其決  
無貳其心指期待旣天實我臨曾無愆素歸御愔愔凡  
是謹囑盡為歌吟天錫皇帝示將保定太平之休繫此  
其證際天所覆咸為我土含識之倫我籍斯附充入舊  
貫天臨萬方子子孫孫永世克昌



欽定四庫全書

紫微集卷二

宋 張嶠 撰

五言古詩

秋懷

前山躋暮氣虛簷納輕陰沉疴稍輕體徐步望遙岑  
天寥天宇淨斐疊秋雲深原野曠蕭條崗阜何崿嶸  
微霜被羣物悴葉聲蕭森遊鱗奔巨壑翔鳥候穹林  
結念非一端滯思紛相尋伊昔抱微尚夙懷塵外心  
風波一震

蕩飄流安可任  
廉頗思趙士  
鍾儀懷楚音  
往憤既切古  
來憂方在今  
安排諒覺言  
委順亦虛襟  
由來窮達士  
萬古同堙沉  
聊申悽斷意  
持和雙南金

奉和李元叔察院秋懷

屯雲生廣澤  
白日互虧蔽  
如何三秋杪  
顧作九暑熾  
高風摧蒲柳  
未覺到蘭蕙  
幽人感歲徂  
節生悲遠志  
伊予老憂患  
感激志鑒寐  
起視籬下花  
節過真少味  
豈無王弘酒  
深愧淵明意  
未然招隱詩  
默契幽林思  
瞻彼區中

人清冽成姜悴安得西山藥飄然以超世

董彌大郎中以窓前菊花晨且鮮明午間姜蕤  
感而成詩興寄古雅次元韻

人生朝氣銳茲花亦復然鮮榮若自矜低垂如乞憐平  
生浙鄞路滿谷為誰妍山深風日美揚芳被涯邊食飲  
賴香潔輕安遺節宣昔乃壽胡廣由來豈其天至理竟  
誰問三歎秋風前

浙鄞屬稷縣有菊潭潭傍之人飲食其水皆老壽胡廣素患風疾沐浴此

水遂愈八  
十餘年

將至臨安途中偶成呈表叔陳給事去非

未契託外親夙昔承顧盼鄧鄙聽論詩房陵共遭亂蒼  
黃南路大雪將沒胔事定訪田家山花已如霰燃薪  
代燈燭新詩仰華絢雨餘登近嶺春晴集兩澗彷彿紙  
坊山泉石眼中見形影一東西音聲阻河縣駕駘自拘  
攣鴻鵠謝羈絆俄瞻九天上更覺斯文煥鄙賤集疊深  
十年雨遭難稠重荷顧存凡庸辱推薦窮途感一飯况  
此膺深眷門牆行欲近仰止極昏旦餘生不自意復得



親談宴存沒割中腸申章淚滂濺

風

一歲三百日烈風朝暮吹不知剖判來曾有無風時况  
茲踰年旱小雨時散絲蓬蓬從天來一掃雲氣離雖荷  
扇暍勞要無膏潤滋功過不相庾退坐徒歎咨何當快  
雨至簷雷如綆縻萬瓦躍冰九千虹注幽池坐見槁死  
苗翠浪翻前陂雨罷樹不搖溟溟天宇垂此事恐無冀  
忘言咏吾詩

普照觀并序

艤舟普照觀道士語予直北山葛仙翁故廬山多黃  
精仙翁故以名山云

欲雨春嵐重微風松韻清泊舟古觀下卧聽山鳥聲行  
樂愜幽步訪僧舒遠情仙翁遯世久巖壑自崢嶸丹竈  
頗可識故基猶未平何當遯世網來此飯黃精

送馮貫道之東川轉而之行在

秋風來萬里草木日夜凋屬茲憫慄時執別在今朝亂

離多苦辛況乃道路窮若人抱奇節勁氣干雲霄結交  
二十年途窮識久要間關復會面益若漆投膠感深念  
存歿投分忘頑嚚汝海昔為別盛年意氣豪及茲分手  
日星星悲二毛壯心隨遇盡曩志與時消別夜月皎皎  
首途方迢迢故園不足懷令德乃所操君其愛爾軀努  
力熙皇朝

送李子勉

馳騫謝新軌息偃思舊扉嬋連悵若人閱歲此音徽直

諒方求益離憂忽在茲平居輕歲月分首重斯時出郭  
郊樹綠夏雲千里奇男兒杖策去行路亦光輝還家未  
徂暑散帙掩郊扉酒醪欸鄰里時果歡稚兒家山恣躋  
攀田野日遨嬉駕駘戀棧豆鴻鵠謝繁維論才惜暫去  
循計豈云非握手錢塘別余歸未有期

送張養正

脫巾造朝市委轡即田廬雖云懷素尚出處亦自如吾  
宗信端諒憲憲為世儒頃以才令選來司中祕書光榮

耀士林側佇翔天衢一朝拂衣去意與張邴俱出錢北  
郭門踟躕立路隅雨餘夏郊綠時覺晴雲驅專城秩匪  
卑還家意復舒誰云離念惡茲行翻足娛徒傷萬里客  
送別在三吳

送馮元通帥夔

烈士志徇名仁人思愛日馮公杖節歸頗全忠孝術狂  
童昔兆亂天常幾反易大臣清國屯公實預謀畫白士  
為臺郎未省聞在昔義為軒冕重功在鍾鼎勒十載猶

故官念言為伊鬱邇來升宰士式序期日夕囊封卻復  
上告去更甫力官榮豈不懷志養不遑息顧我廢蓼莪  
日念掃塋域公方詠南陔肯為高官職絕裾舊疑溫抗  
疏今師密都門行餞君視古無愧色柔甘既獲奉中外  
等事國雖是平生言勉哉宣澤

案原本  
脫一字

詠水上雙白鳥

如鷺大古人  
謂之白雁

夜雨山水清朝暉淨崖壁飛來雙白鳥未省平生識駕  
鵲謝清姿鷗鳥慙素質低昂信波濤顧盼矜羽翮鮮明

潭光青錯亂浪花白輕舫忽東來搶飛百餘尺復下水  
中央相將詎離析稻梁豈深謀飲啄亦自得空山羅網  
稀遂性無驚惕不學西雍鷺翻飛近人跡

春夜山居望月思故園有作

萬壑自清夜春嵐昏衆星明月麗霄漢清風周四溟獨  
立萬里外飄然欲遐征回首望江漢中原氣冥冥東北  
有去鳥我願從之行逝將歸舊邦山河宛平生丘園已  
蕪沒徑術春草青觀臺傾夜雨曲池今向平俯首叫父

老曠野無人聲廬井不復辨灌莽春露凝傷心時震蕩  
懷舊意縱橫夜久林葉光山空泉韻鳴緒風行復革橋  
運無暫停理會衆緣釋情鍾羣慮并靜躁物固殊太空  
本何嬰庶以道自達超遙謝撓寧

六月初八日過龍洞納涼樹陰下酌泉待月而  
行

絕壁不帶土一目千仞青何年架危閣篠窈陵青冥仰  
觀衆樹姿俯聽大壑聲山空響互答隱轉心所驚人生



幾何時冒此絕險行雖獲須臾快未償百年生龍洞視  
正黑水為琴筑鳴層巖積陰厚六月如寒冰泉甘聚壑  
小洞深秘神靈天設境自絕地近人乃輕獨坐蔭佳桂  
峯高日西傾薄暮來者少長風始清冷賞會匪初望徘徊  
但含情坐見山月上衆景紛縱橫密林棲鳥定始復  
事前征

送別

歲晚多烈風鴻雁號廣澤寒日行天邊及茲送歸客余

生足睽異不作兒女色此夕復何夕傷離重悽惻子權  
既云西余行亦將北豈但今日別方異平生跡千里即  
寄書萬里空歎息朝市與山林從茲恐乖隔

達州月夜

薄暮行人息角聲吹已殘城空羣犬吠明月照關山四  
望何所見烟蒼樹團團但聞流水聲不見飛鳥還故園  
天一角時危路間關避地方云始整駕何當旋故人同  
此夕若為懷抱寬

過雲安縣

平日雲安縣常見少陵詩今朝忽經過人生信難期不  
聞鷓鴣鳴蕭蕭山樹悲昔人不可見長江無盡時

山中月夜草色香烈頗如昔年上庸鹿門之遊  
感而為詩

月淡雲始合沉沉山樹清露濡幽氣馥澗草不知名既  
念上庸隱復懷鹿門行睽離馳歲月南北異平生況抱  
懷昔念存沒感中情緬懷故園月亦傍山河明花發因

風散溪流度石平當時游矚地何人復再經客心徒搔  
搔夜色自冥冥蕭散詎為適祇今悲憤盈

呈同遊諸公

衆嶺莽回互古刹藏喬林平川一目盡列岫千重深昔  
人幾經歷我輩復登臨山川諒不改徒傷懷古心

舟中獨夜

泊舟依聚落水色澹餘輝紅樹滿秋山夕烟上霏微稍  
觀漁火明漸見行人稀孤客畏遙夜況乃窮秋時疎蓬

見天星朔風左右吹重衾不能煖展轉枕屢移懷歸意  
戀戀感舊心悽悽驟使百慮集起坐復搔頭人生諒多  
牽吁嗟竟何為

雨霽出郊外

時雨當夜來出郭喜新霽佇立望四郊春容卉無際羣  
山隔大江蒼巖澹相對輕風生水波微露滋花氣緣津  
柳已暗忽悟清明至融怡歲序同俯仰山河異逢時思  
墳墓拜掃十年廢聞有故童僕壺飧酹荒隧新阡固已

遠龍輜尚天外已深濡露悲更下孤臣淚

閩中山間每早白霧四塞咫尺不辨

閩嶺冬候晚歲窮殊未寒誰為五里霧皓皓懷羣山剝  
琢斧斤響啁啾禽鳥間遯聽知何處四顧但漫漫恍如  
湖水秋眇與天相連喬林膏沐已遠岫漸披顏高閣延  
朝景清輝泛林端諒非侵晨興詎識景物閒忽思鄉社  
歲日晏未開關

庚辰二月雪夜作

夜半雨鳴廊晨起雪暗空不減臘月寒故作昨日風融  
銀擁山腰飛花滿裘茸辨此了不難咳唾煩天公纖纖  
園中花一夕無光容凜凜庭下松巍然兩蒼龍

詠鶴

翬然毛羽淨綽與秋風宜闊步循廣庭伸吭矜羽儀  
稻粱謀幾何終然遭繫羈豈銜雲外標遂為時所縻  
因知古清士削迹畏人知

晚行閣道自對溪趨小栢宿

高峯猶返照絕壑已先晦蒼波去不窮青崖儼相對山  
回路欲斷溪豁雙流匯閣道自委蛇林影常澹瀕仰空  
欣樹佳佇立驚石怪山晚雲不驅路暗客猶邁平生事  
幽討興與林泉會何意漂泊年得此行李內境勝固所  
便地絕復多畏娟娟月初上颼颼遠風快幽蟬響復咽  
宿鳥驚欲墜望望驛尚賒應在青烟外

雜興

疎園兩樹杏風雨夜離披離披君莫恨結子還並枝猶



勝西澗水一去杳無期靜坐觀物理令人添鬢絲

遊獨孤城下作

利成山百丈直下獨孤城事往歲月積長江依舊清昔  
人經過地我輩復此行但見竹樹稠石崖如削成喬木  
晚未凋青青發餘榮天寒遠峯澹日晏長川明時危懷  
古意歲暮羈旅情一室寄絕岸全家託柴荆晨炊飯脫  
粟似此田澗氓羣盜正猖獗深居且偷生反念故園日  
默默何由平

詠雪得光字

東皇携春來屬車載霓裳回風作妙舞雜佩鳴珠璫千  
官玉筍班再拜稱瑤觴酒罷各分瑞圭琮粲琳琅浩蕩  
涵濡恩一笑徧八荒塵垢得湔洗焦枯亦輝光偉哉造  
化力天地為翁張功成了不居杲日天中央

喜雪

瀕洞四山沒萬籟無遺聲羣飛喜凌亂遍積愛寬平呈  
姿碧樹立照影方池清出戶延幽意齋心謝羣靈幸有

豐年望初無絲竹情取樂付諸少焚香觀道經何事衝  
寒久微吟詩句成

初夏晚興

微月破幽樹草露生夕涼夏木紛已成時禽暮歸翔間  
花自白紅無人領幽芳晚沐岸輕幘披衣暫倘佯外徇  
志自局理會言可忘俯仰婚宦初未省離土疆那知天  
壤內有地名魏塘竭來歲再華及此身方強豈但理茨  
棟種樹日望長分將百年身送老湖海荒人生等如寓

何必還故鄉

送陸堯夫倅襄陽

我本江漢客十年官到京君為三吳士歛有南雍行風  
波眇汧沂水陸幸俱平是邦雖毀頓生聚今尚成矧君  
勤令德足以惠遺氓井邑應非舊長江如故清峴山雖  
已赭遺記尚縱橫假日當訪古兵廚宜細傾客心終憚  
遠歸意欲遐征鬱紆懷土念去往遊子情待君成政日  
繫我契歸耕送別南歸路復班三峴荆離居何以慰日

夕佇休聲

擬蘇少卿寄內

話別河梁上踟躕古道邊  
男兒重意氣握節向幽燕  
一來單于庭五閨猶未還  
黃雲愁瀚海朔雪暗燕然  
塞柳春猶白河冰煖尚堅  
有懷幽閨婦二八政嬋娟  
寄言當永決欲語詎能宣  
忍苦聊相待恐乖全盛年  
二事熱中腸吞聲徒向天  
紛紛節髦落淚盡秋風前

橘林

后皇毓珍木翠蓋如停雲徠服茲南土素艷方氛氲  
言在深固非用儼封君

村居早出

草白露初曉好鳥啼高林籬下水流急門前山氣深  
花光迷近甸柳色映遙岑春物自鮮紫但傷離亂心  
還成騎馬出惻愴望城陰

大熱

怫鬱厭煩暑稍欣夕氣清彷徨不能寐解帶臨前庭  
長

林激遠颺餘涼入疎櫺白露被百草河漢上縱橫山氣  
自高爽久諧肥遯情羲和當此歲振職在朱明金石亦  
為焦况乃柔脆形陰泉變湯液夕頽成枯莖念彼市朝  
士復嗟田畝氓徙倚待明月徘徊步列星炎蒸豈不苦  
復畏秋風生

借居

借屋得修竹復近清江湄衡門獨看雪衆物有餘姿幽  
鳥下庭靜野泉通櫂遲既諧避世心况與塵事違幸無

井臼勞未免親鋤犂已放西山燒種粟方俟時此外復何作閉門但成詩

出順陽

浮雲作曉陰未放寒日光平岡連縣郭草樹鬱蒼蒼清溪貫其中可以一葦航西流合漢沔水外山微茫紅葉明碧林下有寒菊芳蜂蝶紛已去無風徒自香我欲寄所思遠在天一方安得千里足寬余九回腸

九日三首



白雲冒山頂流闊作深青平林如屯雲中有楓葉潁濕  
烟聚合散小雨時漂零公庭盡日閒停午聞雞聲還如  
在山間契此適野情老菊不作花秋蝶轉伶俜獨坐玩  
物變萬事與心冥遠懷韋蘇州覓句非為名興至一擣  
辭工拙子無撓妍媸理不無要非心所營

憶昔陶元亮閒居愛重九秋菊雖滿園無錢得沽酒悵  
望平野中壺漿俄見讎開罇對來使舉盞屬層岫自古  
節士中高情復安有古人重出處一往不復又俯仰愧

前躅留滯成衰朽名玷金閨籍事落田夫後無地可扶  
犁有鄉但回首黃花開已晚紅萸猶可嗅閉戶無雜賓  
獨理槽牀溜

夏衣著體輕曉氣蒸嵐濕清池湛城闌微風為磨拭今  
朝乃重九萬木猶故碧芙蓉久退紅衰蒲尚森戟歲豐  
農務閒林間聞組織天涯一杯酒勝日同此席論交真  
臭味不必須舊識高談璨齒白謹浪發頰赤向會喜今  
逢追思多古昔十年龍山盛坐客看落筆平生跌宕意

尋勝窮履屐領會苟在心傍人笑脫幘故為牛山會遽  
作兒女泣古人欣佳名且用永今日百年如過鳥萬事  
何損益唯思快雨來窓竹聽夜滴杯行莫暫停城烏歸  
已急林壑暮氣生疎鐘耿明夕尚餘古今囊冥搜句新  
得

斤竹嶺

朧朧曉月淡  
曷曷晨霜耿  
棄馬沙金平  
步過草池嶺  
仰  
登上層雲俯  
降入深井回  
潭冷更清嶺  
樹疎逾整蹊  
荒

陳葉深山回微路永雪霰迷遠空嵐烟護絕境關門僅  
可辨歸塗難具省設險得地形戎醜期遠屏寧辭滿衣  
雪曛黑到絕頂石淺微溜喧獨覺空山靜形寂寢逾熟  
山白夢方醒去路望更遙陟降怯深潭壻水碧于藍何  
由放烟艇

夷陵

吳蜀相持地江山真險固昔聞焚夷陵今茲但遺堵山  
遠欲連天江寬疑浸樹左顧渚宮塗右眺襄陽路野迥

無居人荒村但豺虎依依念鄉井愴愴悲墳墓月淡江  
風寒雲深楚山暮佇立小踟蹰蒼蒼歸鳥去

初夏

孟夏忽已至雨餘草木荒俯澗有驚泉仰林無遺芳山  
中歲事晚是日農始忙布穀鳴遠林田家競農桑故園  
今何為默默心獨傷

防江

兵退田事始夜來春雨勻向時耦耕者十無三四人努

力勿轉徙赦語如陽春

又

大漠與吳越天南天北頭虜尤涉吾地飲馬長淮流飲  
馬尚猶可莫使學操舟

欽定四庫全書

紫微集卷三

宋 張嶠 撰

五言古詩

題石井

精藍負東岑，奇石護山麓。  
巖如車輪一，鏡方黛蓄沉。  
沉不動容澹，瀕立山木。  
日射翠氣浮，遊鱗翻寸玉。  
泉邊羣石潤，淨映僧房綠。  
廬阜勢相高，魚龍爭起伏。  
竒章昔好此，忽棄不見錄。  
青叢晚花明，澗草幽氣馥。  
樹深春去

遠景至夏方燠此地風長清蕭蕭似秋肅南來眇萬里  
雲嶠幾經目安知絕世境在此近山腹超遙輕前遊慷  
慨謝雙足向非來遠客所見信踟蹰寧非造物意設此  
慰羈束人世足埃氛山林有高躅何當襍被來共此巖  
下宿

春晴散步庭下

東風吹廣澤和氣日夜旋微瀾生曲沼積翠被層巒細  
草藹近甸時禽響郊園整巾步庭下申舒委餘暄萬物



各有時而余復何言  
焦穀忘牙事深居  
寄考槃結交之二  
中徵心迂七還聊  
持瞬息念一究空  
有源狂鬧等瓶  
中何須計悲歡

柴門晚步

柴門一延竚暮色集  
四山雨歇林藹變  
歲陰嵐氣寒峯  
高看月上巢昏遲  
鳥還遊眺暫自適  
喪回反長歎幽思  
招隱作愴恨南澗  
篇羈懷定誰識  
淒然獨掩關

遊下巖寺先是劉寶學約於此相聚既而先進

舟遂失勝業

時危適遠縣卧疴蔽疎蓬浮舟難計程一聽水與風今  
日出江口劃見天邊峯維舟邀勝士杖策凌穹崇絕壁  
迤崩厓可驗秋濤雄鐫崖佛像古憑虛樓殿工沄沄牕  
外江落落堦前松澗響雨滂淅雲生樹玲瓏攬勝欣遠  
游撫身悲轉蓬憂樂未相償林霏生晚容却縱中流棹  
回望青蓮宮秋晚山蕭寂雲散烟空濛舟行轉沙尾微  
聞林外鐘惜哉李膺船去若孤征鴻晨暮一相失雲嶠

何年同若縱金門步永遺塵外蹤

過覃氏水南別墅

銷憂苟自誣策杖來幽墅浮舟絕碧水躡履遵遠步置  
酒危碕亭開襟面孤嶼川淺不興波春陰易成暮雜花  
開照牖細草生侵路虛檻滿夕嵐空堦連水霧物變知  
節暄地僻嗟所寓干戈莽未定勝集何能屢觴詠答佳  
游更籌促歸馭一水限山城風烟眇回顧

避賊

避賊入深谷乘桴復悠悠四顧江上山羣峯如薺稠是  
時雪霜霽林壑氛霧收茂樹蔭石壁澄潭深不流蓀蕩  
擁荒崗衝飈忽颭颭山深水更佳溪喧鳥啼幽平昔慕  
尋勝所見良未儔舉世逢禍樞我獨成茲遊暫賞興復  
闌自調寬百憂捨棹陟絕巘林光與雲浮却觀來時江  
碧線縈長洲一室苟自安兩飯無餘求彼蒼未厭亂生  
民何時休傳聞敵人營近在瀕漢州尚恐復飄轉詎敢  
辭淹留已與農父言傭耕事田疇耘紆井田蠶績充

衣裘尚享黃髮期庶幾諧首丘

晚遊新亭

秋至今幾日山雲峯尚奇  
新亭獨騁望詠我秋懷詩  
碧水縈麓轉幽蟬映葉悲  
古藤依翠壁茂樹鏡清池  
賞會情方適憂來忽自滋  
荒山逃死地落日故園思  
遇亂甘身棄持心與世違  
應人時懶語兀坐獨攄頤  
沉思山烟冥微吟暮影移  
祇應從此去寂寞但如斯

寄題趙丞相獨往亭

留侯佐漢日結志已離羣唐樂閑退年涉險勤邦君區  
中豈所慕物外良作論上宰曩僑寓新亭初目存緬懷  
杖策時風衣自翻翻原本缺二句竹密徑迷遠孤遊遺世紛  
憩松翫碧草臨流睇歸雲山晚落花積溪深啼鳥喧攬  
物覺意適依風嗟世屯雖安吳越勝詎忘河洛尊畢輔  
中興業終回西北轅扈蹕歸廟社角巾反丘樊遊矚河  
華郊往來鄠杜村規摹王粲宅彷彿辟疆園斯亭回首  
地應為閭里言

翫所植松竹有作

往歲客閩嶺滿目皆黃茅而今居魏塘白水漫平臯舉  
頭無所見惟聞風怒號我身如枯枿雨露自相遼又如  
在寒谷終歲雪霜驕四顧萬物春悽然不自聊復思畢  
竟空更使心陶陶釀酒嘗苦薄種花嘗苦彫酒乃亂性  
具花為眩目妖棄置不復近樹竹延清飈况有手植松  
雨夜能蕭蕭瞑目存黃庭屏居非慕高所願侶松竹遲  
以延松喬

何子應金華書院寄題

平生子何子自贊如柳州昨緣功名迂悞落西南陬借  
宅備三徑讀書窮九丘身與蒼梧間心同湘水悠時為  
鮑謝句自作商聲謳入戶山嶷嶷垂簷竹修修不携東  
山妓居是東山流子長擅史冊傳家稱故侯矧君外王  
父晚嘗陳帝猷君傳衣鉢久軒昂似前修勿以一跌故  
便欲榮菟裘解手舊年永寄書新歲稠君其自貴珍端  
歸侍凝旒



題營山法幢院

天晴白雲高喬木蔭初暑久客倦紅塵愛此崖寺古時  
危僧飯少日晏無鐘鼓下馬憩幽軒光風轉林莽新竹  
雨來香餘花夏方吐避地適三巴精藍暫延佇回憶鹿  
門遊淫淫涕如雨

久雨

秋末結層陰風雨連歲暮寒空暗霏微曠野流雲霧居  
人蔽蓬茅行子悲道路紛紛天地間劇易隨所務獨有

掩關人存真唯內顧

春夜雨

小雨集春夜憶居江漢時西園桃李樹到晚有餘姿  
載酒繞阡陌折芳恣遨嬉里閭多樂事中年遭亂離飄零  
向十載南來復再暮故園當日春相見一天涯他鄉花  
自發山寺日初遲時節豈云異身世自堪悲

次韻王倅大梵寺山亭夜雨

溪山含變態可玩不可說西嶺澹斜暉前山明積雪淖

空游鱗出景晏飛鳥絕遠嶼上孤烟平沙散疎樾天涯  
一尊酒草草堂上設觴詠寄高爽對此清夜月但使息  
營營寧論醉兀兀寓興合一篇亡書謝三篋

自順陽至均房道五首用陳符寶去非韻

行客路正遠曦馭已西馳霜風吹草樹眇眇連荒陂如  
何羈旅懷更值搖落時四序歟已晚我生可無衰尚紆  
俗吏袍久負南山期吾廬豈固好此身自安之胡為終  
歲別使我心怕悲故園松菊荒靜計勿差池

桑柘共平陸過橋野色分冬序日向深冒山多薄雲驚  
颺入長林黃葉久紛紛山前有人家雞犬時一聞

我行均陽道岡阜如羣駝澗石既齒齒寒山亦峨峨喬  
林木葉盡仰見鶴鶴窠風景固不殊舉目異山河我生  
雖尚壯百慮紛已多祇今且如此後日當奈何細較平  
生中憂樂恒相摩悲吟誰復聽日暮越前坡

行客日暮時愁聞蕭條風雲山當我前適與清興同夕  
澗生白烟蒸空自溟濛林壑豈不佳陟降煩奴僮徑側

有黃花淒疎隱珍叢我欲採落英恨無聖賢中徘徊戀  
幽意欲住興來窮山深月正黑投驛尚怱怱

蓐食帶殘月驅僕事西奔烟塵猶未息去住敢輕論道  
古留餘險溪寒減漲痕鳴桴聞遠驛吠犬應前村境絕  
增詩興山深畏客魂吾生久已定漂轉任乾坤

秋日訪野人

忽忽倦幽獨試尋居士室循籬野蔓懸閉戶鄰雞出小  
水已清冷前山政岑鬱禾黍滿平川高低動殘日

過平陵漢蘇建所封

寒食光輝薄古原  
多夕陰行經平陵道  
感慨一何深  
將軍昔封此  
漢史傳至今  
山川宛如舊  
事跡嗟已沉  
聚落有人烟  
故國無喬林  
尚想英雄氣  
千古猶森森  
邊塵久未定  
干戈日相尋  
興懷幾內慟  
何必鼓聲音

上分水嶺

夜半風撼山  
苦雨歇初曉  
高峯吹成冰  
草樹葉盡縞  
行行入雲中  
稍稍臨木杪  
恍疑天宇近  
漸覺溪溜小  
挺身

陵絕頂夔與人代杳篁竹互蒙籠岡巒亘縈繞乃知七  
閩境如此平地少攻擊固其然割據亦可考始悟淮南  
書鋪陳苦未了右顧遠中原前瞻臨嶺嶠邊馬猶亂華  
淮瀆尚雲擾故鄉豈不懷甘心混蠻獠九夷儻可歸吾  
願從高鳥

臘梅

朔風吹同雲萬木不敢芳黃衣何許仙窈窕來離房終  
期賞心會未恨冰雪鄉向來脂粉流晚睥誰敢當宜於

風露晨置在清淨箱更招能賦客  
必第詠奇香楚人意已疎亡聞為操章

山中雪後頗有春意

山明雪猶積林白梅已綻凍泉時斷續  
晴雲既流爛山空樵者歸樹響遊蜂散  
愁同平子多游比相如倦晞髮近陽阿  
長歌何時旦

癸亥生日前一日讀神仙李清傳作

孟夏倏已晚詰旦及懸弧推遷驚歲序  
俯仰念勞勩感



物嘆漂泊撫已既叨踰去事日已遠來者言足圖澹漠  
遠世紛超遙觀道書伊昔有勝士染工藏市區感悟及  
生朝欲訪仙人閭自縊投絕壑果諧欣願初塵念雖少  
牽脫屣終不渝一死會當有貴賤理必俱萬事惟一捨  
此外無復餘李君本市人而予豈非夫躡屣千仞崗振  
策萬里塗暫愒即弱水款關必清都千載復來歸陵谷  
知焉如

將請鄉郡作

本初休車騎陶令歸田園憧憧天壤間何人無一厘惟  
我若斷梗漂流淞江邊牽絲始立歲屏處知命年虛恬  
因勢使憔悴仍化遷愧無楊僕功居不外漢闕又非穉  
季俠徒使牆垣穿欲收衰病身迺遷還故山風波渺萬  
里欲去無由緣願竊刺史符一臨江漢壩敢同畫繡歸  
僅比遼鶴翻送老得三徑奉親歸九原如斯志願畢天  
恩真滿泉所祈造物心俯徇人欲偏決策在今歲無令  
辜願言

上二溪山

積雨連日夜敢謂今旦晴  
綠彩泛林端愛此朝景明  
晨炊肅徒馭結束方上征  
千巖屹穹隆萬壑臨崢嶸  
誰知有微逕在此蒼翠屏  
昔聞五尺道

見西南夷傳

馳心已伶俜

今朝復何朝冒此絕險行  
側路不容足下瞰千仞阮  
步武一蹉跌隕身如建瓴  
避地本愛死茲行豈偷生  
籃輿仗僮人崎嶇信所經  
下為崖石礙上苦蘿蔓攬  
陰巖多沮洳泥苔汰相仍  
薄暮雨欲來白雲起如蒸  
稍觀前山

暗已復如懸繩行行入中林心悸萬鼓鳴三泉如雪翻  
競瀉石上聲值此絕世景避賊難為情路轉復臨川濁  
流方滿盈波神恣桀驚勢欲丘壑平雄張擁行潦河瀆  
將抗衡我方媚斯水敢誇海若名叫度雨踰急山烟深  
杳冥捨棹即絕壁扶持陟磴層經行細石墜十步九戰  
兢羊腸與三塗其險莫與京叱馭匪前哲但覺微命輕  
須臾至田家茅茨耿清燈篝火燎衣濕坐使愁慮并夜  
雨喧客耳羈夢何由成平明起長望重陰竟四暝嘉禾

垂隴病惡木連山榮兵荒蕪歲惡吁嗟此黎氓泥水方  
自蔽出門諒何能窮居未覺苦籬外長峯青

上楮平山

層陰生萬里歲晚嵐霧昏終日轉盤道那知入寒雲忽  
上最高頂劃見衆山繁嵯峨插蒼昊迫窄塞厚坤俯仰  
混一氣眺聽屬無垠直欲遡豐隆逝將排帝闕小臣敢  
上訴邊塵暗中原天寧忍下土厭此豺虎羣庶幾動真  
宰一洗戎馬氛此意復茫昧側佇揚精魂

劉谷山

奉令事設險茲山再經歷歲暮陰雲昏雪後杉桂碧修  
篁亞路低老木參天直下瞰穹谷中衆樹紛若戟或為  
龍蛇鬪或作熊虎躑陰崖不受春冬帶輪囷色古苔如  
綠毛因依露猶滴陰風忽動谷衆籟久方寂儻非神物  
居定有龍蛇宅山陰魏家平百丈峙絕壁戰樓摩雲霄  
武帳侵斗極鉤援諒無庸梯衝當棄絕雖無墨翟守天  
險豈所敵攬勝心以愉經險情屢惕撫事既靡愆微驅

諒安惜何當四海晏誅茅此投迹詩成無與言搔首三  
歎息

野竹

野竹何修修森然滿山麓清溪漱蒼根夜雨滋寒玉幹  
密風豈搖林深鳥應宿蒼山黃葉中見此歎驚目經行  
一回首何用慰羈束

穗粟

世亂棄祿仕居間食苦貧置田上庸山稍依農畝鄰歲

入無幾何誅求方荐臻老農幸導我播植當自勤晨起  
具餽糧伐木西澗濱畲田去歲秋穡粟今年春肥磽半  
百畝良苗生已勻監督課子弟耘耔煩隸人所望在一  
飽詎敢悲苦辛及此歲將晏場功躬自親所得未償費  
相顧但深顰歸去且讀書愧茲百年身

將池僧舍東軒曉起

茲軒臨絕頂遠與前山平睡起月初上冷冷曉風清暗  
嶺躍飛雷白雲出疎星四顧莽不辨惟聞候蟲鳴居人



正酣寢我已事晨征思婦閨中意游子天外情策羸取  
微徑羈夢何由成

種竹

屏居倦幽獨出門無所適種竹滿前庭坐玩凌寒色森  
森密陰淨竦竦條幹直晴日借景光霜風時蕩析自我  
來此居三見歲華易小孫漸成童長楊憶初植雜花亦  
紛然似欲娛閒寂世慮久已忘況乃頭半白舊鄉喪亂  
後城郭滿荆棘藉使能北歸亦不異作客獨懷首丘念

未易忘日夕讀書計誠謬習靜理何益萬事烏過空何處留遺跡世故漫酬酢迢迢混今昔

庚申寒食湖上作

今朝寒食節撥撒揮涕餘何心事游行誰使膏我車出門悟春遠綠遍萬里塗陰林雜花稀巨樹新葉敷春風慰游客蕩漾回衣裾舉杯復置杯岸幘唯平湖豈無坐上客不見朱與徐

四月旦大雨晝夜不止者兩日微水一夕暴漲

山木綠陰暗駭雲當晝繁驚風乍掩冉積雨連荒村映  
岫若銀竹瀉澗如翻盆懸雷遂及旦暗空還至昏長川  
怒方蓄濁浪正崩奔暫見沒岸草已復侵山樊衝波激  
遠嶼聚沫旋林根劈箭搖定目殷雷驚客魂俄吞衆瀨  
沒澆潏成齣齣波神信雄桀灝漾方無垠儻不究其源  
豈辯河瀆尊朝盈暮已竭暫滿安足論明旦立沙尾若  
帶青沄沄

七月初四日小雨後遊步水邊

雨止林葉淨遊步喜川平  
停午衆陰寂山高一蟬鳴  
境靜道心熟世疎塵慮輕  
涼颼颼已至自適羲皇情

和張薄韻

平昔志升車年來但芒屨  
前旬返城邑宵旦未踰數  
及茲復入山始覺離亂苦  
行行望遠峯山村猶幾許  
風清初戒寒雲垂欲收雨  
羸馬尚嘶林吾行已遵渚  
茂樹曩堪攀澄潭今可俯  
秋意滿山川微烟澹村塢  
經過竹籬側倦極欣一語  
三鍾應昔志一室固堪處  
去留非本心

偶地因為主野屋盡茅茨山田多瘠鹵菽粟工療飢薯  
蕓行堪煮一水可乘流從公公莫禦

雪中泛漢水觀捕魚

既遊天漢地復泛清漢流我本襄漢人對酒集百憂是  
時雲氣昏雪片迷汀洲沉沉百丈潭坐看漁子游重裘  
憫渾脫得雋憐深投舞空清渚迥遍積修篁幽山川疑  
舊里歌舞迷新遊薄暮理歸棹中流任夷猶忽驚在鄉  
社誰辨陰成樓歛知非舊邦沈瀾涕難收

感事

西山一丸藥終當持遺親奈何嗜利者藉口託愛君太  
真絕袖去中興為名臣功業竟誰歸老嫗終苦辛大恩  
竟不報初無烏鵲仁

投身螭彪域寧免衆鬼欺黃昏風雨集所向道路迷一  
鬼在前嘯羣鬼爭和之從以衆妖鳥紛披鳴樹枝訓狐  
當傍叫破獍隨後啼斯須哭土梟次第嗥狐狸睢盱恣  
陵傲蹠蹕爭新奇變態遂百出殽然當時胡為乃歷

茲側佇成睟眙其始為股栗慘悽粟生肌懼以柔脆軀  
遂為衆鬼縻其中稍自定注視但嗟咨其終乃釋然堅  
坐翻愉怡鬼見不為動技窮將罷歸人命固有常此物  
終何為遲留待明發請與衆鬼辭

春晚風雨甚暴衡門獨立望微水有作

中原殊未平避地甘羈束著意問樵漁尚恐驚麋鹿出  
門亦何事望望清江曲雨氣晚來寒驚風亂新綠

方城驛

古驛藏幽谷回環亂峯稠驛前山特秀翠氣光浮浮晴  
日經短簷竒溫驚敝裘門前萬山道過客空悠悠憶昔  
廬戢黎伐庸此淹留山中老鸛鶴應識旌旆愁事去一  
轉首巖花幾經秋石磴與澗道猶是曩者否祇應軍旅  
聲長咽寒溪流



欽定四庫全書

紫微集卷四

宋 張嶠 撰

五言古詩

遊靈巖寺

吳王避暑地西施採香路陵谷偶未移山川尚如故遺  
宮俱泯滅輪奐乃僧戶梵放想遺轉考槃疑箕虛繁華  
隨化遷歛若高鳥度憂勤及豫怠興隆與傾仆何異貉  
一丘同歸易晞露平湖際遠海環山莽回互澗草足芳

韭山泉多沮洳昔人經行處賞會今已屢來者復為誰  
將亦遵往步新故更遞代一往復何故日暮鐘磬間聊  
將澹吾慮

南澗亭詩并序

舟如上強步松路四里有山突然當前其陽無住居  
士之所葬也其陰仙人劉綱之所棲隱也東南不十  
舉武入竹徑蒙籠深翳竹盡得亭下臨崖谷始復高  
爽羣山林立其傍山深氣溫竹樹正碧間以丹葉可

玩初冬風日淒厲詠柳子厚南澗詩頗與之合因以  
名其亭亭東數步抵山足復為小亭水鳴篴竹間如  
弄琴筑名曰鳴筑雖境皆甚美然過時坐久使人神  
意悄愴非天資靜素不徇世紛者未易居也陳本之  
曰願得記而賦之余曰諾哉紹興甲子十月初七日

行穿密竹盡勝槩集斯亭地遠嵐光重冬溫草木青俯  
鑒含空水還觀山作屏巖溜有時歇松聲無甞停遐思  
南澗作彷彿識儀刑世緣因歲闊靜習與心冥離人慕

肥遯駐屐戀巖扃不似投荒柳悲吟涕淚零

入峽

天秋萬象靜雲橫亂峯起已下微王山入峽自茲始驚  
湍於此盡安流澹如砥兩山鬱嵯峨壁立相對峙上凌  
空崇外下挿淥淨底層巖碧樹滋洄潭丹葉委舟行石  
罅中江流瓮城裏舉頭天若帶墮此清瀾瀾忽驚龕巖  
大奔浪喧客耳魚陀考方言歲出魚萬尾水邊菖蒲青  
石上土花紫淙流來不絕無由訪源委俄經陳佗洞斬

絕不容趾土人若猿猱躋攀因葛藟燃火入其中數丈  
神披靡覩茲泉壑迴始覺化工偉投身西南陬肆意閱  
竒詭是邦不生人境勝乃如此寧非造物初意盡向山  
水神驚畏石墜志豁欣樹美窮探日易晚惜去船欲艤  
徐聞湧波濤漸見山崩施竒觀忽驚過我興方未已賴  
此慰羈愁無庸傷轉徙

過楊村溪

坡陀兩山間滄波旦夕驚高柳橫澄流歲久根全露細

雨川上來瀾漪滿  
汭沂灌木生退灘  
危橋架孤嶼石瀨  
斲春冰山雲粉輕  
絮往歲憶經過物  
色如雅素陽春日  
已遠嘆息流年度  
來軌不整停往躅  
自成故初為閩嶺  
遊後指江東去風  
急子規啼何由傍  
歸路

春晝睡起偶書二首

忽忽掩關卧起來  
春日曛和風吹草  
木雜花紛已繁他  
鄉農事興悽然懷  
故園青山雖滿眼  
何用慰憂煩

閉戶長春草日晏  
獨高眠起步遶廣  
庭愛此風景妍青

山羅郭外白日當中天坐見柳意濃亦知花向殘鷄鳴  
水外村人耕原上田玩物意方適居閒情轉延忽悟是  
作客驟使心悵然

五月二十四日自達州至永睦縣投宿廢學即

事書懷

學廢鄉校空鳥雀欲據有甚雨晚來晴循簷厭黃口已  
水亦能大一暮沒堤柳落照滿漲川歸雲翼山岫達州  
去未遠望望空回首母老兒未齒何苦事西走輕生冒

畏塗用意在升斗三復禱雨辭此道廢已久恭聞賢侍郎求才如恐後密置鄭莊驛屢接駿蔑手英俊頗雲集巖穴猶輻湊管蒯且不遺豈獨棄枯朽矧嘗辱英盼屢以溫言授私心頗感激嘗欲事奔走音攪衣中夜起頻面不盡垢平生慕蘭心已在轅門右某也獲洛人時命大不偶讀書慕經濟頗亦略句讀雅意死知己且復羞自售耻為轅下駒終若喪家狗遭亂乏祿食避地闕田畝栖栖窮塗間但未操井臼我公寧忍茲無令混樵叟



去年十一月十二日致宏如秦州僕餞之餘口  
復到生口作別明年六月十二日僕自竹山避  
地汴流上餘口道由生口復經分手之地感時  
書事奉寄致宏時建炎四年也

憶昔游河梁對床三夜語平生慷慨心遠別顏亦苦朔  
風黃葉深尚記驅車去君行已映林我首猶屢顧重經  
分手地物色宛如許懷人感河山撫節驚寒暑別來世  
事多瑣細不足數惟有綠林徒跳梁猶若故漢南十二

州一半為盜據向之西來師猛鷙類熊虎從以萬馬羣  
旌旃蔽村塢惟知口打賊未辨狸搏鼠徵求徒浚民萬  
分一無補空令貧者斃復使富室窶去年粟如金艱食  
古未覩今春瀕漢州秋種不入土如何十萬師不辦一  
朝貯傳聞許汝郊平民盡俘擄秋高馬首南跬足仰誰  
禦棲山無定居處邑復多懼無資憂殍踣有粟畏攘取  
懷安昔所戒隨衆謀遠舉第恐向他州未保終安堵悠  
悠四海間託身定何所憂來如鼎焦意亂若焚縷君家

聚族多巢幙多風雨胡為事遠遊  
遙歸莫容與

過大包閣寄夏漕致宏

積雪天欲晴山深霧猶擁大包誰締結  
架壑一何聳嵯傾石路仄峽束驚波湧  
垂堂尚何言顛墜虞接踵經過固已殆  
卻顧神屢悚前山淨如洗浩浩雲根動  
嵯花作蜜香山童似猴拱舊鄉迷遠近  
所歷但如夢窮通久已忘況此髮種種  
猶欣故人近寬我懼將恐語亂眉定顰  
道舊腹應捧燈前侍兒出花外寒煙重  
羈懷醉裏寬離

念風前恫游宦愧吹竽劇談猶賈勇觀君富聲華顧我  
成闌茸行臺定匪賒失喜欲踴躍

南山觀梅

春雪欲垂地春水縠紋浮亂山無人到梅花供客愁輕  
風側烏帽韶序欺白頭攀條記舊賞嗅藥悲前遊斜日  
忽反照煙華風際流已歎繁華盛俄觀青蔭稠沉吟兩  
京路側悵瀕漢洲尚想萬玉妃清樽交獻酬天涯歎  
憔悴覽物空夷猶飲罷不能賦臨風三歎休

晨起登寺閣前山為霧覆微露山麓宛如平遠

偶書春物

日出霧猶重微茫認山麓遠目疑可窮澶漫如夷陸韶  
序日已深時禽轉幽谷青林不受春景氣潤脩竹日晴  
烟光亂風澹水容淥閩嶺農事初荒泉被山曲耒耜沒  
深泥鳧鴨謹相逐躬耕記往年遭亂成羈束故園隔山  
河桑柘猶在目丘隴諒荒蕪春歸惟灌木囚拘愴茲晨  
儻徯悲前躅緣情固攀援理會何桎梏且寄終日閒玩

此春苗綠

廬陵曾氏臨江作亭以舍過客因同舍來求詩  
亂後足漂零所至倦遷客那知此江上飛亭跨石客  
來贛山青客去贛水寂徙倚亭上人悠悠往來陌

月下觀海棠

澄空流華月列炬林梢綴衆焰爍明霞紅暉花似醉流  
連陶嘉月共惜春風駛預歎他日來餘紅紛滿地

贈別

艾杼滅澆殪方召平夷蠻夏書紀少康小雅詠周宣茂  
烈蓋當代休聲垂億年君臣今望之猶若神人然皇天  
昔降亂國步多艱辛海宇政搖蕩封疆託大臣召旻歌  
卒章三復徒愴神冠攘有厚賞山林多賤貧小夫矜寵  
秩持以傲寒士達人每大觀詎肯屈其志從人畏損名  
不從斯逆耳骯髒每不容委隨多狗死孔明佐玄德君  
臣稱魚水田祖輔本初復諫昧良圖蜀成鼎足勢臥龍  
名益都袁喪官渡師二臣隨見屠女蘿依青松薺蔓相

綿延歲暮饒雪霜枝幹猶縈纏蔓草生毀垣逢時亦芊  
芊積雨毀垣墜苔穎亦以乾婉婉我良友才具宜佐時  
果敢無與前議論有餘資功名可立致要當慎其為吳  
橘北化橙良玉貴不緇行矣保令圖懷哉絲路悲

再經蒲溪往年避地處

淹流既失策賊至甘遠屏往歲憶曾遊徑路猶可省今  
來冬向除昔至夏方永山寒竹樹疎歲陰雲霧冷破屋  
今已無荒筠蔓枯穎昔人安在哉經過涕垂領



窮陰忽霽獨往山下看梅

千峰雪猶積萬木春已迴窮陰倦羈束忽欣陽景開徐  
步出衡門中野展幽懷杖策遂侵尋獨下前山隈驚湍  
激遠飈疎簷耿寒梅婆娑時動容似與客徘徊歲晏益  
多感況斯韶景催暫賞豈所懽離念方催頽還觀增愴  
惻三歎為誰來

鳴筑亭

碕岸互縈斜因依愛筠綠雖疑境過清未必傷幽獨偶

坐松下石泉聲作琴筑

贈趙端

殘方歲已晏層陰萬里生何如苦寒際子有關陝行風  
煙正浩蕩夜雨吹成冰時危壯士志日暮游客情感子  
請別意令我肝膽傾告之以盡言念子遠徂征聊代繞  
朝策勉旃圖令名

贈陳符寶去非

大雅久不作此風日蕭條紛紛世上兒啁啾亂鳴蜩唯

公妙句法字字陵風騷如鼓清廟絃聽者無淫滔癯瘦  
藏具美和平蓄餘豪思苦理自寄志深言益高顧我吟  
風苦知公心力勞世無杜陵老誰知何水曹柳韋儻可  
作論詩應定交

贈元方叔

吾叔超世士筆力回狂瀾作詩到合處未謝春草篇罷  
官守環堵冷屋風蕭然操尚非矯世靜退真所安慷慨  
引濁醪俛默窺塵編冥搜得新語自喜欲忘年常言畢

婚嫁歸老漢水邊此意有真趣勿為兒輩言

與孫太冲游湖上寺

作客歲月久新春生白鬚淹留竟何爲閉戶猶繙書今  
朝天氣佳逍遙步城隅初旭野尚晦青草含露濡好風  
如有期微漪滿平湖白日照原野青山開畫圖晴林峰  
外稠壞塔煙中孤山坳見修竹游步得僧居地偏蘭茝  
芳氣暖天桃舒何年深宮姬藁葬依浮圖一往隨化遷  
豈復平陽車顧之三歎息不飲定何如

醒心泉

幽泉清見石停停映山樹風定絕漪瀾雨餘多沮洳適  
諧塵外心時來澹吾慮靈竇幾年開何由訊源委泉上  
木陰稠交柯存清泚憶昔遊杏山蒙泉政如此

溪水

溪水東流去何時合大江豈無雙鯉魚附書還故鄉不  
憂溪水遲所恨壠坂長臨流一歎息四顧山蒼蒼

渡溪水

清溪寒不流空明涵萬象連山倒景來顧盼迷俯仰雲  
浮潭底深鳥度鏡中往悠悠寒藻疎一一游魚上危橋  
颭長碕行客情屢愴溪傍萬竿竹矗矗倚崕嶂蒼根帶  
古色落葉墮深廣陰森暗藩籬蕭蕭撼掃空曠無人結茅  
茨有客契心賞物外識遠情天邊知旅況野店猶遠煙  
僕夫力難強何以紓我懷浩歌聊自放

勸農

奉詔勵農耦建旗行近郊流雲生薄陰遠色澹平臯溪

口逾散渙山遠始峇堯柔荑展翠茵穹石架長橋蹙休  
佳士廬竹樹干雲霄步障疑圍飾雜花競媚妖粧面羞  
短垣兒童驚鼓鐃皇恩信廣大祇事因遊遨競識使君  
車夫婦雜顛毛竟夕不知回偃月生林梢已舉候亭火  
猶滯川上撓撫已愧民氓歸思戒屯膏

沐髮

今旦一沐浴廢茲簡編功讀書豈常懃鞭策常自攻緊  
予髮種種力此將何庸不如掩卷坐前山翠濛濛

瘦

駑馬固多肉元鶴原骨輕以彼棧豆意方此雲霄情汨  
汨世紛遠蕭蕭中慮盈將尋包道士一問昇天行

暑雨遂如深秋

炎蒸成積雨異候無寒暑睡覺無餘聲清燈翳復吐長  
年遭喪亂萬事其誰語渴日閱流年茫然忘去取諒無  
經世心還山藝禾黍

登真觀在利州嘉川縣西五里南臨宋江相傳



云張天師棲真之地至今有遺履池縣下二十  
餘里江心有積石土人謂天師殯鬼堆石上有  
紋隱起類篆籀土人謂天師符觀中多大柏連  
抱皆數百年物也又有鐵鑄老君二其一已損  
六月初五日少息觀中聞其事于小童與石刻  
頗驗云

天師羽化久殊館臨官道繫馬松門深風清亂蟬噪開  
基今幾時庭樹皆連抱有池號遺履無地尋丹竈金像

獨儼然詎識何人造學仙匪吾事訪古乃其好物色聊  
默存他年憶曾到

贈黃子真

再來居槁李又枉故人車故人固是客我居豈吾廬共  
在天之涯猶如水中鳬細話漢傍事想見江紆餘死者  
不可作生者多離居無輕今日別與子皆白鬚臨分尚  
何言早寄江陰書

齋祠湖上作

還山映平湖未厭傷極目籃輿值初晴步步轉湖曲宿  
霧鬱喬林寒曦煦穹谷廢刹今幾時浮圖在山腹村荒  
樵牧多歲晚梗稻熟曲岸倒菰蒲回潭聚鳬鷺前瞻嵐  
嶺分右顧緣原綠遊眺整蕭疎沉吟反羈束齋祠奉簡  
書尸素慙微祿日暮聞幽禽睠此林下宿

四月十一日遊湖上作

餘花送春暮群綠迎夏初清晨出郡郭溪山含雨濡宿  
靄昏近麓初陽艷平湖空明映山樹澹淡浮青蕪亭亭

天際峰微茫如有無縱櫂水波闊叩舷幽意抒白鳥若  
娛人盡日鳴菰蒲舉酒一相囑岸巾清嘯餘佳游雖浩  
蕩離念終鬱紆寄與北來客賞心良自誣

山中紅葉

青女銜微巧染絳妬春工如何青林表忽有萬炬紅渾  
疑在絕塞斥堠傳夕烽爛爛爍晚日煜煜含天風錦繡  
滿山谷佳興浩無窮全勝在蕭寺吟翫廣庭中

沂流入微王峽

又上微王峽山寒含翠霧青壁盡侵雲鱗鱗多碧樹山  
深石狀古地僻禽聲怒竟日不逢人茫茫水空注

與趙智叔議弟泛舟回燈下

西風今日寒細雨濕青嶂微江水淥波大石牽舟上岸  
菊猶未芳山木先後黃滿灘圓石淨兩岸鳴寒蟹回舟  
暮色集颼颼雨聲急愛此雲林幽未信衣巾濕初為山  
水遊藉以驅離憂及此賞心盡翻茲羈客愁來歸向蓬  
茅樹黑風蕭蕭背壁青燈暗山空夜寂寥

晨起

鹽櫛及平旦曉庭風露清蕭然無一事對此夏陰成春  
晚方受謝孤花有餘榮地遠物性遂時禽自飛鳴書籍  
但掩卷冲虛道已盈非為隱淪客自快適野情

早行

平湖望不極天垂作週遭今朝春風暴連漪生微濤高  
楊明遠村黃花點青臯可驗去人遠烏鳶低作巢老年  
無戲事即此當游遨浮舟不知遠但覺白日高煙中何

處寺孤塔冠山椒

中秋四十一弟歸自豫章

老病罷搜句空對秋月明寂寥天宇迫慘慄夜氣清  
松門委餘照蕭散此閒行歸來坐庭除濁酒聊自傾  
但喜親愛會豈謂賞心并回思故園夜惻愴獨緘情

贈相僧楊嬾散

野鶴本長生孤雲無定意託迹雖世間游心乃塵外  
請問絳人年曾觀柏寢器微言洞倚伏妙中驚人世  
往夏

識方瞳今春分別袂飛帆煙雨外駐錫雲林際逸興輕  
遠游滯念牽離思後夜聽鐘鳴應在寒山寺

喜晴

陽春今已歸孟夏饒草莽積雨樹陰成新晴渚蒲長前  
山澗水喧隔竹黃鸝響一徑度喬林涓流會心賞野靜  
閒無人蕭條成獨往

題竹

南州困歎暑蔽映資貧簷簾捲午陰靜窓開夕氣涼徑



幽憐筍密庭空喜幹長相期待歲晏持以凌繁霜

六月初七日雨小止遊蒲溪臨獨木橋而還

石岩兩相束竹樹交柯綠因聽林外聲遂來幽澗曲濕  
煙深不散淺瀨漂寒玉木杪見雲生前峰聊注目

林鴉詩

長楸弄朝日吳宮聞夜啼晨集主人屋暮宿上林枝如  
何失儔侶獨向空林飛

西溪

西溪泱泱來佇立溪橋上回風生微瀾夜雨發幽響聽  
茲無盡聲詎覺年華往

曉登靈梵寺閣

晨氣霧露除初日照高閣青山偪歲昏碧樹霜餘落俯  
澗愛鳴泉臨郊美華薄幽情歛自欣鄉念頻成愕且寄  
當日閒無論今與昨

晨登高望閣愛此經簷日稍觀宿霧捲坐見前山出望  
岫喜林疎聞泉今竹密與世若相忘懷人如有失聊此

寄晨昏慚無經世術

雨

冥冥雲出溪浩浩風薄木濕煙驅不散映岫森雨足場  
功既云畢麥隴望已綠矧予無一事屏處謝追逐霜空  
晴固佳雨暗亦所欲悠悠老大心萬事付所屬獨敢私  
言潤活盡新栽竹

題景溫筠居

昔遊安康道野竹曉森森疎離隱茅茨置屋何幽深卜

鄰嗟未辦長夢秋風林如何嘉公子得此蕭寺陰作軒  
面蒼根坐卧當幽尋夜雨老苔色微風助哀音軒前置  
綠蟻軒後陳素琴我料之子意必無朝市心宜邀能賦  
客為擬效古吟折簡索我詩高詠慚南金

弔和靖故居

顏垣已蕪漫人事日蕭寂賴近青蓮宮殘僧識遺跡傍  
連嵐嶺秀面對湖光溢惟應此如昨萬變非疇日悠悠  
夏已深故沼荷初積振古盡如斯徒然悵今昔

雪晴

陽崖被積雪照水自光輝  
乘暖時時墮偏憐映日飛  
經行嗟境勝去去與心違  
居者詎知此日高猶掩扉



